

Aningaasanut tunngasumik ingerlatsivimmik (finansiel virksomhed), tassannga aningaasaateqarfik, sillimmasiisarfik, soraarnerussutisiaqarfik kalaallinik tamakkiisumik amerlanerussuteqartunilluunniit pigineqartussamik, pilersitsinissamut periarfissanik nalunaarusiornissamut Naalakkersuisut peqquneqarnissaannut Inatsisartut aalajangiiffigisassaattut siunnersuut. Nalunaarusiaq UKA2026 aallartinnginnerani Inatsisartunut agguanneqassaaq

(Inatsisartuni eqimattak, Naleraq)

(Siullermeerneqarnera)

Qujanaq Naleqqap eqimattaanut siunnersuuteqarnissinnut.

Demokraatit tunngaviatigut isumaqarput, Namminersorlutik Oqartussat suliffeqarfimmik ingerlatsissanngitsut. Namminersorlutik Oqartussat suliassaraat nunarput aqussallugu aammalu inuussutissarsiortunut pitsaasunik sinaakkusiissallutik. Namminersorlutik Oqartussalli suliassarinnigilaat suliffeqarfinnik ingerlatsissallutik namminersortunut unammillernikkut. Maani nunatsinni pisariaqartippagut inuussutissarsiortut nukittuut, unammillersinnaasut eqeersimaartullu, tamannalu angusinnaavarput namminersorlutik suliniuteqartut periarfissinnerisigut aammalu ineriartornissaannut periarfissinnerisigut.

Una siunnersuut tamakkiisumik- imaluunniit amerlanerussuteqartunilluunniit kalaallinit pigineqartumik aningaasanut tunngasumik ingerlatsivimmik pilersitsisinnaanermut periarfissanik misissuinissamut tunngassuteqarpoq. Tamanna pitsaasumik iliornerunngilaq. Aningaasanik ingerlatsivik paasiuminaattuuvog annertuumillu aningaasaateqarnissamik pisariaqartitsilluni, sulisunik immikkut ilisimasalinnik pikkorissunik aammalu annertuumik pitsaanngitsunik kinguneqarsinnaaneranut aqutsisinnaanermik annertuumik pisariaqartitsilluni. Namminersorlutik Oqartussat aningaaserivimmik imaluunniit allamik aningaasanut tunngasumik ingerlatsivimmik pigisaqassappat, kingunerissavaa, inuiaqatigiit – tassalu innuttaasut – aningaasatigut ajutooriataarsinnaaneranut akisussaasuunissaat. Naleqqutinngilaq, akisussaassuseqarnerunanilu. Pisortat aningaasaataat atugarissaarnermut pingaartitatsinnut, peqqinnissamut ilinniartitaanermullu atorneqassapput. Pisortalli aningaasaataat aningaasanut tunngasumik ingerlatsiviit ingerlanneqarnerannut atorneqassanngillat.

Tassungalu ilutigalugu naleqquttuussanngilaq, pisortat toqqaannartumik aningaaserivinnut sillimmasiisarfinnullu, maani nunatsinni ingerlatereersunut unammillilissappata. Niuernermut tatiginninnermut annikillisaataassaaq aammalu atuisunut aningaasaliisimasunullu nalornilersitsissalluni. Misilittakkat takutippaat, aningaasanut tunngasunik ingerlatsineq pitsaanerpaasartog, namminersortunit ingerlanneqaraangami, naammassisaqarsinnaanermik, pitsaassutsimik nutaaliornermillu kajumissusilinnit.



Demokraatit paasilluarsinnaavaat, maannakkut immikkoortumi tassani unammilligassaqartoq. Innuttaasut suliffeqarfiillu amerlasoorujussuit misigaat erniat qaffasissut, akitsuutit ajornartorsiutillu taarsigassarsiniarnermi. Tamanna annermik pisarpoq nunaqarfinni isorliunerusunilu. Unamminartumullu aaqqiissutaasinnaanngilaq pisortanit pigineqartumik aningaasanut tunngasunik ingerlatsivimmik pilersitsigaanni. Aaqqiissutissaq unaavoq unammilleqatigiinnerup nukittorsarnissaa, malittarisassiornerup pitsanngorsarnissaa piumasaqaataasullu pilersinnissaat, namminersortunut suliniuteqartunut amerlanerusunut aallartitsinissamut pilerinartunngorlugu.

Taamaattorli Naalakkersuisut akissuteqaataat Demokraatiniit ilalerpagut, pisortat ingerlatsivii ingerlatseqatigiiffiillu sillimasiinermut aningaasartuutit ikilisarneqarnissaanut atatillugu Naalakkersuisut misissuineramik ingerlataqareernerat ersertoq. Sulineq tamanna ingerlatseqatigiiffiit akimorlugit sillimasiisarnermut aaqqiissuteqartoqarsinnaanera periarfissarsiuunneqarneranik imaluunniit aningaasartuutitigut eqaallisaanerit aammalu sumiiffimmi aningaasanik attassiinnarnissamit imaqarpoq.

Siunnersuut una sulinermut tassunga ilaliiginnartussatut Naalakkersuisut naliliinerat Demokraatiniit ilalerparput. Taamaattumillu siunnersuut ataatsimiitsitaliamut susassaqartumut ingerlateqqillugu.